

Պարենաւորման հողի վրա, փետրւար և մարտ ամիսներին, նոյնիսկ մի քանի ցույցեր էին տեղի ունեցել քաղաքային ինքնավարութիւններին և պարենաւորման նախարարութեան դէմ: Բուլշեւիկները գրգռում էին ամբոխի մութ բնազդները. խօսում էին այն անսպառ հացի, շաքարի, հագուստեղէնի ու նաւթի մասին, որ պիտի լեցւի Հայաստան հէ՛նց որ հաստատուի խորհրդային իշխանութիւն, և հրաւիրում էին տապալելու «դաշնակների բռնապետութիւնը»: Սոված ու տկլոր մարգրիկ, ի հարկէ, հեշտութեամբ ենթարկում էին այսպիսի քարոզչութեան և կոյր գործիք էին դառնում բուլշեւիկների ձեռքին: Պէտք է արձանագրել և այն իրողութիւնը, որ տնտեսական տագնապն ու սովը իբրև քաղաքական պայքարի գէնք գործ էին անում ո՛չ միայն միջոցների մէջ խտրութիւն չդնող բուլշեւիկները, այլ և ուրիշ՝ աւելի չափաւոր տարբերը, ինչպէս, օրինակ, Ժողովրդական կուսակցութիւնը:

Մինչև վերջերս հայ բուլշեւիկները ժխտում էին այն մեղադրանքը, թէ իրենք Հանրապետութեան օրով աշխատել են պետական յեղաշրջում առաջ բերել, թէ մայիսեան օրերին որոշել են ընդհանուր ապստամբութիւն անել: Այժմ արդէն, հէնց իրենց կողմից հրատարակւած բազմաթիւ փաստերով ու վաւերագրերով, հաստատուում է, որ 1919 և 1920 թւականների ընթացքում հայ կոմունիստները Հայաստանում պատրաստելիս են եղել, ապստամբութեան միջոցով, խորտակելու Հայաստանի անկախութիւնը*):

Այս տեսակէտից հետաքրքրական են հայ բուլշեւիկ պարագլուխների վկայութիւնները.

«Բուլշեւիկեան ակտիւ և խտացած գործունէութիւնը Հայաստանի տերիտորիայում, գրում է Ս. Կասեանը,**) իրապէս սկսել է 1919 թւի ամառանից: Ծիշտ է, առաջ էլ եղել են այդտեղ զրուպաներ, բայց որովհետեւ մեր կուսակցութեան Երկրային Կոմիտէն կտրւած է եղել Հայաստանից, նա չի կարողացել ոչ կազմակերպչական գործ կատարել այդ զրուպաների միջոցով, ո՛չ էլ ուղղութիւն աւել նրանց գործունէութեանը: Անգլիացիների դալուց յետոյ, երբ դաշնակներն աւելի էին երես առել և իշխանութիւնն ամբողջապէս կենտրոնացրել իրենց ձեռքը, այդ զրուպաների գործունէութիւնը լիկւրդացիայի է ենթարկուում համարեա ամբողջապէս: Նոյն տարւայ սեպտեմբերին, նախապատրաստական աշխատանքներից յետոյ, Երկրային Կոմիտէի ներկայացուցիչները կազմակերպում են Երևանում՝ դաւառներից հրաւիրւած պատասխանատու ընկերների գաղտնի խորհրդակցութիւն, ուր մշակում է այդ երկրում մեր գործունէութեան հիմնական տակտիկան և ստեղծում կենտրոնական մարմին՝ «Հայաստանի Կոմիտէ»:

Այս խորհրդակցութիւնը, ըստ Կասեանի, մեկնում է այն փաստից, որ Հայաստանում «արդիւնագործական կապիտալիզմի նշոյն անգամ գոյութիւն չունի», «առևտրական կապիտալիզմի դէմքն էլ վաղուց մոռացւել է», «գիւղացիութեան խոշորագոյն մասը անձանօթ է լատիֆունդիական, նոյն իսկ կալաւածատիրական յարաբերութիւններին, ուր ազգաբնակչութեան 90% աղքատութեան և զրկանքի մէջ է քարշ տալիս իր խղճուկ գոյութիւնը», և

*) Տես, ի միջի այլոց, Ե. Ամիրխանեանի «Մայիսեան Ապստամբութիւնը Հայաստանում», 1926. Մոսկւա և Աշ. Յովհաննիսեանի «Հայաստանի Յեղափոխութեան Յուլիսն ու Հոկտեմբերը», Երևան, 1925թ.

**) «Նոր Աշխարհ», ամսագիր, սեպտեմբեր, 1922թ. № 2: